



LA PATRIE DAL FRIÛL

SFUEI MENSÏL INDIPENDENT

Direzion e Aministrazion - Udine - via del Cotonificio 129

Tassa pagata / Taxe perçue Udine Italy - mensile / mensil spedizion in abonament postâl Poste italiane s.p.a.

LINT AUTONOMISTE




Autonomie differenziade: gjavînsi fûr daurman dal balet roman

Dree Valcic

❖❖ La leç su la autonomie differenziade e chë sul presidenzialism a tegnin banc inte discussion politiche di chescj mës. La ipotes di un referendum, aromai imboconade de oposizion di centriçampe cun chë di fermâ la norme, e sarâ l'argoment principâl de lote politiche in Italie. Tant che citadins di chest Stât, il risultât al varâ un pës ançe su la vite publiche dai furlans, par chest o crôt che il nestri judizi al vedi di jessi net e cence esitazioni ançe a cost di jessi calculâts separatiscj. Chest al è un judizi che al fâs fâ bocje di ridi, ma che al acompagne par altri il moviment autonomist za de sô nassite, cuant che pre Checo Placerean al vignive bolât tant che "austriacant" intai rapuarts de polizie politiche udinese. La robe no nus spauris: al è di chë serie di lûcs comuns che si à cirût simpri di emarginâ e di discreditâ ogni forme di contrast istituzionâl che al metès in discussion la forme dal Stât atuâl.

❖❖ La unitât de Italie e je un "mantra" che al ven dissepult ançe su chë che e ven clamade "autonomie differenziade". I dissepui di Salvini e Vannacci - no stin a clamâju plui leghiscj par no ofindi chei milions di oms e di feminis che a àn crodût intai valôrs di libertât esprimûts dal *Carroccio* dai siei prins agns -, si acanin a repeti che chestis leçs a infuartiran cheste unitât. La çampe e berle ae sô dissoluzion, Fratelli d'Italia no fâs un drame, se no eletoral, pe pierdite di vôts possibile al Sud, sigure che si trati di une bufule, che anzit (al va indenat a pagj. 2) ▶



EDITORIÂL

MIÔR FURLANS O CITADINS DAL NUIE?

Walter Tomada

I popui a àn une identitât ançe se no le vuelin. Tant che ogni om al nas e che al cres cuntun non, un cognon, un puest di divignince, e un document che lu comprove, cussì ançe i popui a vegnin di un timp lontan e di une tiere dongje, a clamin lis robis intune maniere particolâr e diferente che e je la lôr lenghe, e a viodin il mont intune clâf originâl. Magari chest element tantis voltis al ven dât par scontât, ma dispès vuê si cjate cui che al dinee chest caratar dal so jessi. Ma cun ce reson? Parcè refudâ la proprie identitât?

◆ I oms par solit a cambiin muse, non o identitât cuant che a àn alc di platâ. O, se no àn vergogne o intenzions brutis, lu fasin par diventâ plui "biei", plui impuartants, par someâ plui siôrs o potents, fasintsi une filusumie gnove (magari di plastiche) o vendint cuarp e anime a cui che al pâr plui bon di fâju sinti part di une comunitât plui grande e fuarte. Cussì al è ançe pai popui. Lu diseve za pre Toni Beline che al viodeve cemût che par tancj furlans "la partecipazion al marcjât mondiâl e vâl la pierdite de proprie lenghe e culture", ançe se "tal marcjât globâl no sin plui tra chei che a comprin, ma te marcjanze in (s)vendite".

◆ Al è plen di int che cuant che si tabaie di furlan, di tutele de lenghe

e de necessitât di meti in vore ce che al covente par no fâle murî, e pant fastidi e marum. No si capis ce che ur dâ fastidi dal jessi furlans al pont di dineâ no dome la lôr stesse identitât, ma pretindi di scancelâ ançe chë di chei altris. No àn cussience di judâ la muart cidine dal lôr popul, ma intant a gjoldin a infuessâ la specificitât dai furlans, tratant la culture di chenti come un sotprodoto contadin e antic, une robe che e varès di spesê a murî par mudânus in ce? In "fradis de Italie"? In citadins dal mont? O in citadins dal nuie?

◆ "La Patrie dal Friûl" e je la cove di chei che a àn la cussience che il mont al à bisugne di jessi un mosaic fat di miârs di tocs sflandorôs, no

dome di pocjîs pieris che ae fin a son dutis companis e cence sugjestion. Il dispresi par ce che si è, e la voie di mudâ piel, lenghe e storie par diventâ alc che nol è ni cjar ni pes, e nol à valôr, no nus partegnin. O vin miôr jessi borghesans di un piçul toc di mont che citadins dal nuie. Si cjapin ogni di su lis spalîs la responsabilitât di fâ sorevivi une storie, une lenghe e une culture parcè che se al mûr il furlan, a muerin i furlans e al mûr ançe il Friûl, che al è a simpri stât "incorporât" di duçj che chei lu àn cjatât su la lôr strade di invasion o di colaborazion, ma che al è simpri restât se stes parcè che la sô divignince e ven di lontan.

◆ Cu la sparizion de lenghe e de int

che le fevele a laressin in mancul ançe duçj i valôrs che la identitât e mostre lontan dal lusôr, ma che si notin une vore ben cuant che la flame si distude e lôr a sparissin. "Al è plui facil inacuartzisi dal vueit cuant che a vegnin a mancjâ che no dal benefici de lôr presince", al notave pre Toni, e trop che al veve reson si viôt cumò che la identitât furlane e je smamide e no je plui il lat che al nudris i nestris zovins. Viers di ce ju sburtie la modernitât globâl che ur fâs di gnûf riferiment, stant che i lôr paris e maris a vuelin cambiâ muse e identitât? Tal miôr dai câs, viers de migrazion, stant che - cence cussience des lidris - ogni puest tal mont al è compagn par vivi, lavorâ e meti sù famee. E je ançe une altre muse de medaie, e si viôt tes cronichis di chestis setemanis: *baby gangs*, violence, pôre, e une mancjance preoccupante di sens che e puarte a une cressite des dependencis di droghe, alcul e zûc che a tachin simpri plui adore. Dute colpe de crisi di identitât? No sigûr. Ma no si pues platâ che, se no rivin a dâ ai nestris fantats une reson par crodi tal avignî e par dâ une prospetive ae lôr presince in chest cjanton di mont, il pericol al è chel di slargjâ la popolazion che une volte si clamave furlane, ma che simpri di plui e sta diventant citadine dal nuie. ■

❖ a pagjine 3

MESTRIS

Intervistis a personaçs de culture furlane su chei che a son stâts i lôr riferiments di Dree Venier

❖ a pagjine 4

IL LÂT DI CJAVAÇ

Un sît impuartant e pôc considerât pe biodiversitât di Gianluca Rassati

❖ a pagjine 5 e 12

VIZIS E VIRTÛTS E CJARGNELAS

Dôs gnovis rubrichis par cure di Diego Navarra e Agnul Floramo

❖ a pagjine 7

IL LUNARI DI LUI

La cusine, i Sants, la fieste, i proverbis, i lavôrs de tiere... par cure di Mario Martinis

LINT AUTONOMISTE

(al va indenant de prime pagjine)

Autonomie
diferenziade:
gjavînsi fûr daurman
dal balet roman

Dree Valcic

e coventarà a rinfuarçâ il podê di control dal guvier su lis Regions.

*** Parcè che ae fin dai zûcs al sucedarà chest: cundut des peraulonis, des promessis, des cimiadis ai industriâi e aes categoriis produtivis dal Nord, nol cambiarà nuie se no il pês che a cuistaràn i ministeris finanziariis romans intal concedi o mancul lis prebendis pal funzionament des gnovis competencis.

*** Gjavînsi fûr di chest balet.

No lu fasarà la Region Friûl-Vignesie Julie, parcè che il president Fedriga nol pues permetisi di discontentâ il so cjapitul, savint che il prossim pas al sarà la pierdite de specialitât e il realizâsi di chel Triveneto suicide, che al è tant cjâr al potent Venit dongje di nô.

*** No lu fasan in sindicâts locâi, che e je cognossude ben la lôr fedeltât ai uficis "nazionâi", e nancje i partîts, che aromai ur rivin i ordins sui celulârs. E no lu fasan nancje lis categoriis economicis. La Glesie? E cirarà di puartâse fûr tra lis dôs opzions cun cualchi consei "discret" par difindi i dirits di chei plui debii.

*** O vin di fâlu nô, cirint chê unitât di popul che nus permetarès di no fâsi strissinâ pe enesime volte intun contrast ideologic che al tocje i partîts talians.

Cheste e je la vere autonomie, ce separatism! ■

INT DI CJARGNE

I Plans di Vurgnè a Dimponç,
une aziende agricole
come pint jenfri des gjenerazions

Marta Vezzi



IL BIEL ZARDIN CUL CHIOSC, I ZÛCS PAI FRUTS E LA AZIENDE

“O soi avonde plene di cefâs, ma stoi ben. No vevin pensât di rivâ a chest pont!” – cussi e comence la cjacarade cun Martine Merlo, titulâr de Aziende Agricole “I Plans di Vurgnè” pôc sore di Dimponç, frazion di Tumieç. “Il gno om al veve chest stali che fint a pôc timp fa si rivave dome a pît. In tancj agns lu vin sistemât e lu dopravin par cjatâsi insiem in famee. Un pôcs di agns fa a àn fat une strade e e à tacât a zirâ ancje int. Alore o sin lâts in Comun par viodi cemût sistemâ e regolarizâ dut. Cuan che o sin lâts in Comun, di bon che o jerin sentâts cuant che nus àn dit la cifre dal condon che o varessin scugnût paiâ par regolarizâ la struture e che o vevin di sdrumâ dut ce che o vevin fat sù. La aziende agricole e je stade la nestre maniere par frontâ i problemis. Cussi tal 2017/2018 o vin tacât i lavôrs e o vin podût vierzi il pont vendite dai nestris prodots (muruculis, lampons, moris, robe di ort, mîl e v.i.) Cuan che e tacave la stagjon,

o scugnivi puartâle a trasformâ in marmeladis, sirops, mignestrin e duncje o vevi bisugne di un puest indulâ meti la robe. Par chest o vin sistemât la stale che e je diventade il magazen e pont vendite dai prodots.

◆ La int e rivave sù e mi diseve “Ce biel puest, pecjât che no si pues bevi un caffè”. In chel Invier i vin pensât parsore o vin fat sù un piçul barachin di fûr, a la buine. Fat chest, la int e à tacât a di “Ma no podêso fâ un plat di afetât, no cumbinaiso?”

O vevi za tal cjâf di vè une cusine indulâ metimi a fâ lis mès marmeladis cence scugnî lâ a puartâ ator la robe. Cussi o vin fat ancje chê e la place pe ristorazion. L’an passât, tal mès di Avrîl, o vin viert chest lûc di ristorazion di fûr, sot une tetoie indulâ che a stan 25 personis. Pecjât che l’an passât, come ancje chest an, al jere frêt e o vin pensât di mudâ il dipuesit di imprescj intune sale par mangjâ a sotet. Chest an mi àn domandât di fâ gustâs par comunions, batisims, cresimis, matrimonis...

e cussi o sin rivâts fin achì!”

◆ Martine e je une persone solâr, dinamiche e cun tante voie di fâ. Dal lunis ae joibe e lavore cul om e de sabide dopomisdì ae domenie e je impegnade inte aziende agricole indulâ che e ten ancje doi mussuts e uns pocj di gjalinis. Par fortune i dan une man ancje i siei fis, sò brût e, clâr, il so om.

La cusine si vierç dai 2 di Jugn a misdi la domenie, sabide dopomisdì al è viert il chiosc e domenie a buinore si pues lâ a fâ di gulizion.

◆ “De place di Dimponç e partis la strade che intun minût ti mene in cheste localitât. – e continue



I DOI MUSSUTS

Martine – Si pues ancje pensâ di lassâ la machine in place e fâ une cjaminade fin chi di me. Tancj ancje de zone mi disin che no pensavin che al fos cussi biel chest puest. Di chi si pues lâ a San Florean e fâ altris zirs a pît tal mieç de nature. La robe bieles e je che il celulâr nol cjape.

Plans di Vurgnè al è il non vecjo dal lûc. Cuan che tu rivis sù, tu ti cjatis cun tancj plans di parons diferents. Une volte, cuant che a lavin a fâ fen, a disevin “O lin a Vurgnè”. Mè madone e veve un grum di tocs da seâ. I vecjos a àn lavorât tant chestis tieris, cun tancj sacrificis, vignint sù a pît e se cumò achì al è alc al è in grazie di lôr. Il nestri dovè al è chel di mantignî il teritori come che a varessin vût gust lôr di viodi. O vin di fâ cognossi cheste tiere di Cjargne: un puest cetant biel che al merete di jessi scuvier!” ■

ARLEF

Une borse di studi sul furlan
e su lis sôs lenghis “sûrs”
(rumanç e ladin)

Redazion

Al è timp fin ai 11 di Lui par presentâ la candidature pe amission al cors di dotorât di ricercje in Linguistiche promovût de Universitât Libare di Bolzan adun cu la Universitât dai studis di Verone e in colaborazion cu la ARLeF-Agenzie regjonâl pe lenghe furlane. Tra lis siet borsis a disposizion, une e je dedicade al projet su la analisi comparative des politichis di tutele dal rumanç, dal ladin e dal furlan.

◆ La borse di studi e vignarà assegnade al projet miôr inte aree tematiche de sociolinguistiche: l’argoment centrâl al varà di tratâ de tutele juridiche e des politichis linguistichis publichis leadis aes lenghis di minorance furlane, ladine dolomitiche e rumance dai Grisons. Il projet al varà di previodi

la analisi detaiade des normis e dai documents di planificazion che a son in vore in di di vuè, cun chê di furnî un studi comparatîf di chestis trê realtâts.

◆ La selezion e previôt un colocui lâ che si discutarà il projet di ricercje presentât e là che si valutaràn lis competencis linguistichis dal candidat, che, in plui dal talian, al scugnarà vè une competence buine dal inglès (lenghe principâl di insegnament) e dal todesc. Jessi parons dal furlan, dal ladin e dal rumanç al sarà un titul preferenziâl. ◆ Il cors di dotorât al formarà professioniscj di nivel sientific alt e i dotorants a podaran zovâsi di metodologiis, imprescj e risultâts svilupâts dilunc di projets. Dutis lis informazions a son a disposizion online su www.unibz.it ■

FURLANS,
a son passe 50 agns che si cjatin a Aquilee
la di de fieste dai sants Macôr e Fortunât pal
AVÔT DAL FRIÛL
e o cjantin Messe te nestre lenghe,
tal spirt di chê libertât che si iludevin
di podê respirâ almancul in glesie
scomençant a doprâ il Messâl,
che al è ancjemò
intune spierte penose par jessi fat bon.
Cun fedeltât, si cjatin istès
domenie ai 14 di Lui
aes 6 e mieze sore sere te Basiliche.

GLESIE FURLANE
in colaborazion cun
La Patrie dal Friûl
Associazione Colonos

FRIÛL EUROPE

La Europe e va a drete e tal gnûf PE e cale la rapresentance di minorancis e nazionalitâts

Marco Stolfo



Lis elezions europeanis dal 2024 a son ladis sù par jù cemût che si spietavisi ae vilie: cuntune tignude o cuntune incessite des diestris nazionalistis sei di guvier, plui o mancul euroconformistis, sei di guvier o di oposizion, cuntun profil marcât plui a clâr di euroseticisim fuart o di antieuropeisim arût. Cussì tal gnûf PE, cun 720 components, il grup dal PPE (Partît Popolâr European, di centridiestre) si conferme il prin e al passe di 176 membrs (cuant che in dut i eurodeputâts a jerin 705) a 189, intant che i doi grups plui a diestre (chel dai Conservadôrs, ECR, e chel di Identitât e Democracie, ID) a vuadagnin eurodeputâts e a passin di 69 a 83 e di 49 a 58. Al pues stâi che chescj numars a cambiin ancjemò almancul fin a Lui, stant che a son partîts e singui eletts di cheste aree politiche che a àn ancjemò di decidi la lôr colocazion. Pal rest, se i socialiscj a tegnin avonde

bot (a passin di 139 a 136: mancul trê, che però a pesin di plui intal gnûf PE) e la Çampe e cjape trê eurodeputâts in plui, passant di 36 a 39, i liberâi di Renew Europe a pierdin un bon numar di rapresentants e a passin di 102 a 74. Al piert vincj eurodeputâts (di 71 a 51) ancje il grup là che si dan dongje i Verts e la Aleanza Libare Europeane (ALE), il partît che al ten dongje la plui part dai partîts e dai moviments nazionalitaris e regionaliscj.

◆ Pes fuarcis politicis di cheste fate, dispès espressions di comunitâts piçulis in tiermins numericis e di difusion gjeografiche, al è simpri plui difilic rivâ a cjapâ part aes elezions dal PE e, tra normis, sbaraments e dimensions des circoscrizions, ancje la partecipazion e la capacitât di cjapâ consens a vegnin condizionadis a fuart. Al è emblematic ce che al è sucedût tal Stât talian cul “decret elezions”, che cundut che a jerin propit elezions europeanis, al à

limitât la presentazion des listis cence scugnî tirâ sù firmis dome ai partîts presints inte Cjamare o tal Senât, cence tignî cont de apartignince ai grups dal PE e cussì la ipotesi di une liste de ALE (AeA, Autonomie e Ambiente) e je lade sù pai steccs. Tal Stât francês la liste e je stade presentade, ma e je restade sot dal sbarament a nivel statâl e no à rivât a mandâ a Strasburc e Brussel nissun rapresentant (prime al jere il cors François Alfonsi). Al è sucedût compagn in Grece, cu la liste dal partît di riferiment de minorance turche in Tracie che e à cjapât il numar plui alt di vòts tai territoris di Rhodope e Xhanti, ma nol è stât avonde.

◆ Ur à lade miôr aes coalizions metudis adun dai partîts nazionalitaris e regionaliscj tal Stât spagnûl. La liste Ahora Repúblicas, là che si davin dongje i bascs di EH Bildu, i catalans di ERC e i galizians dal BNG, e je stade la cuarte, par numar di vòts, inte circoscrizion uniche a nivel statâl, cun sù par jù il 5%, e cussì e à confermât i siei trê eurodeputâts (un par om: doi tal grup Verts/ALE; un in chel de Çampe). A àn cjapât un rapresentant par om chês altris dôs listis; chê catalane di Junts i Lliures, vuidade dal partît di Carles Puigdemont, e chê di CEUS, vuidade dai bascs EAJ-PNV e de Coalicion Canaria. Altris grups di Catalogne, País Valenzian e Aragon a àn presentât i lôr candidâts inte liste di çampe di Sumar (che e à cjapât il 4,65%). ◆ Dongje dai europarlamentârs che a son tai grups dai Verts/ALE e de Çampe, rapresentants di minorancis e nazionalitâts si cjatin ancje ta chei altris grups, tacant dal PPE, cun Herbert Dorfmann de SVP e Loránt Vincze, espression de minorance ongjarese in Romania, e dal ECR, là che si cjatin i trê eletts dal partît conservadôr flamant N-VA. ■

SLOVENIE

Slovenie e Cravuzie a drete

Alessio Potocco



Ancje i citadins di Slovenie e Cravuzie (come chei di ducj i 27 País membrs de Union europeane) a son stâts clamâts a votâ ai prins di Jugn par elei i gnûfs europarlamentârs. In ducj i doi chescj Stâts, come pe plui part di chei altris, e à vinçût la coalizion di centridrete. Viodin i risultâts des urnis, zontant che però i eletôrs slovens a àn votât ancje par cuatri referendum (ducj cu la vitorie dal “sì”).

◆ Tal País nestri vicin, i seçs tal Parlament a son cumò 9, un di plui a pet di cinc agns indaûr. Cemût che tai ultins mès i scandais eletorâi a disevin a clâr, i partîts de oposizion di centridrete a àn cjapât plui vòts. Prin di ducj, il Partît democratic di Janez Janša, protagonist de politiche slovene za dai timps de fondazion de Republiche indipendente: 30,6% pal Sds e cuatri seçs, doi in plui de legislaçure passade. Al secont puest Svoboda!, il Moviment Libertât dal prin ministri di centriçampe Robert Golob, fer al 22,2% cun doi puecj, juste come cinc agns indaûr. Al à cjapât un bon 10,5% Vesna, il partît dai Verts, che al è rivât a cjapâ un seç; un puest ancje pai socialdemocraticis dal Sd cul 7,74% e par Nova Slovenija, liste di centridrete (N.Si, 7,66%).

◆ Avonde bas il dât de afluente: 41,5% (cuintri dal 51,1% inte UE), dut cás simpri miôr di chel dal 2019, cuant che a lerin a votâ dome il 28,9%. Par dîle juste, cheste cressite dai votants (però simpri mancul di un su doi) e je ancje merit de cjatade

dal guvier Golob, che al à pensât ben di meti adun aes Europeanis ancje cuatri referendums populârs, in maniere di sparagnâ coscj e timp e, si capis, cirint di stiçâ plui int a là a votâ. Une vore impuartantis pe societât slovene (e no dome) lis tematicis des cuatri domandis: doi referendums a vevin a ce fâ cu la coltivazion sul territori slovene de canabis e il so ùs par finalitâts medicis (“sì” 66,7%) o pal consum personal (“sì” 51,5%). Unevresintût ancje chel li che si domandave se il Stât al vesdi fâ buine cualchile çapro de assistence mediche pe eutanasia (“sì” 54,8%); in ultin, un cuesit su la introduzion de pussibilitât di scrivi preferencis pai candidâts elezions parlamentârs (“sì” 70,8%). ◆ In Cravuzie, l’air al à tirât de bande compagne; l’Hdz di centridrete al prin puest cul 34,6% e 6 seçs, l’Sdp (socialdemocraticis) 26% e 4 sentis, une invezit pal Moviment patriotic di drete (8,8%) e par Možemo! (“Nò o podin!”) di çampe cul 5,9%. I eletôrs a àn dut cás pandût a fuart il lôr disinterès, stant che la afluente e je stade dome dal 21,3%. ■

AUSTRIE

Cumò al è sigûr: di chest Istât a Clanfurt a ziraran dome bus cence sofêr

Barbara Cinausero



I progjet che al previôt il traspuart di personis di un puest a di un altri de citât su navutis cul pilote automatic, si clamarà “Smart Urban Region Austria Alps Adriatic”, in struc “SURAAA”. Autobus cence sofêr, a vuide autonome: e somee fantasience, ma a Pörschach a son une realtât bielzà dal 2017. ◆ Ancje a Clanfurt si è provât intal 2018 cuntun bus a vuide automatiche che par une setemane al à fat servizi de Alten Platz fin al palaç dal Parlament regional. Cumò si scomence plui in grant: i bus shuttle a viazaran de stazion Ovest de universitât,

dulinvie de Villacher StraÙe e il Südring, passant pal Minimundus, par rivâ al Lakesidepark e indaûr. Lavorant ad implen, lis trê navutis a ziraran dal lunis al vinars, fale che intes oris di ponte e si podaran doprà sore nuie.

◆ Lis provis si fasaran intal mès di Jugn, ma cence passizîrs e, se dut al funzionerà, si scomençarà in Lui cul servizi vèr. Ogni navute e podarà menâ nûf personis e e sarâ vuidade midiant di un sisteme satellitâr di videocjamariis e sensôrs che i mandaran une imajin a 360° dal ambient che i sta ator. La navute e corarà suntune sine virtuâl, cuntune precision di 1,5

cm. In cás gravis un intendent ae sigurece al podarà intervignî su la corse cuntun joystick.

◆ Lis navutis a coraran vie par Clanfurt a une velocitât medie di 20 km/h, in mût plausibil cence creâ problemis su la Villacher StraÙe a plui corsiiis, intant che su la Universitätsstraße i automobiliscj che ses cjataran devant, a varan di vè pazienze! Une vuide masse dongje o ben

taiâi la strade a son tuessins pes navutis, stant che i sensôrs a son tarâts su la sigurece, si che duncje i automobii a scugnaràn mantignî distancis di sigurece, come che si à imparât a scuele vuide.

◆ L’implant al sarès chel di meti a disposizion navutis a sofêr automatic 24 oris su 24 e siet dîs su siet, tignint bot in cheste maniere ae manciance croniche di autiscj e fasint cuintri ancje al cambiament

climatic e al incuinament causonât di ducj i citadins che a scuegnin doprà la machine in citât ancje par tratis une vore curtis. Stant ai amministradôrs dal progjet, dut chest al sarâ metût in vore dentri dal 2030.

◆ Tant che o vin vût dit, lis navutis a son za une realtât a Pörschach za dal 2017 indenand, là che a son stadis dopradis ogni di di plui di 20.000 passizîrs, ma e je une realtât che e à cualchi intop. Il mès di Avost dal an passât une navute e je lade intor di une auto in soste. Chest al è sucedût in modalitât manûâl, intant di une manovre di parcament. La tecnologie e à simpri dôs musis e la prudence no je mai masse. Il progjet di Clanfurt al sarâ nome une prime cerce. Lis navutis a coraran fin ae Sierade, daûr di un orari che al sarâ pandût cuant che il servizi al scomençarà a funzionâ. Se la valutazion e sarâ positive, l’an cu ven a saran metûts in vore altris provis.. ■

**Par viodi chei altris contignûts
de “La Patrie dal Friûl”,**

abonaitsi. Dutis lis informazions si cjatin sul sît
www.lapatriedalfriul.org



**Per vedere gli altri contenuti
de “La Patrie dal Friûl”,**

abbonatevi. Tutte le informazioni si trovano sul sito
www.lapatriedalfriul.org

Che tu sedis za abonât o che tu le vedis lete dome cualchi volte,
aboniti o rinove l'abonament a un mensîl unic:

almancul une volte al mês, lei par furlan!

